

四庫全書

集部

欽定四庫全書

空同集卷三十四

明 李夢陽 撰

五言絕句

神京樂

薊谷襟東海居庸鎖北門王者本無外天險壯乾坤

其二

天回金氣合星順玉衡平雲生翡翠殿日麗鳳凰城

其三

鐘鳴長樂館樂奏未央宮壽域皇圖迥鉤陳紫極通

其四

衛霍干城舊伊夔鼎鬲新萬年天子壽四海一家春

望南城

南內夕煙歛玉樓春望空禁籞年年鎖園禽巢殿中

晚出禁闥

楊柳南城道芙蓉小苑通內使來調馬君王勅射熊

其二

夾城雲氣夕露掌隱金盤楊花白雪亂風起滿長安

東華門偶述

銀甕爛生光盤龍繡袂香但知從內出不省賜何王

采蓮曲

白鷺青天映紅妝綠水遙笑語荷花裏爭蕩木蘭橈

大堤曲

臘月大堤邊春風思宛然楊枝搖白日烟色裊金鞭

艷曲

盈盈綺闥女生長不知春開窓見百結背面掩羅巾

其二

父母愛少女女是聰明子生不識鴛鴦繡出鴛鴦是

春曲

春風度山閣凭軒望江路簾動時有香不見花開處

其二

翩翩誰家燕銜泥向何所避人花叢裏忽復梁間語

楊白花

三月大路旁綠楊弄芳春可憐
雪白花來往送行人

其二

寧唱采菱曲休歌楊白花
菱生猶有蒂花去落誰家

相和歌

美人羅帶長風吹不到地
低頭采玉簪頭上玉簪墜

月夜吟

月出東方高刺刺燈下語
漂搖林中籜淅淅如寒雨

九月見花

長安桃李樹秋晚復花枝九陌寒煙裏無風自落時

聞笛

白日挂雲間誰家玉笛閒北風吹楊柳落葉滿關山

曙

城雲白欲曙沙月上猶殘獨步憐紅葉空庭玉露團

望浦煙

客愁何處落滌滌久浦煙日出浦烟歇客愁還復然

九日京中

白雁獨橫秋黃花伴醉遊眼看風物換愁殺仲宣樓

正月見雁

憶昨辭京邑相隨南雁歸如何早春日獨見北鴻飛

出郭

出郭携尊屢尋園步屨遲莫言春事晚猶是百花時

野望

夕靜山容歛秋凝野色淒白雲留絕巘蒼霧隔前溪

晚出大堤姪葉來迓

裊裊綠楊西雙翻碧玉蹄何由識小阮為聽紫騮嘶

石頭口竹飲

白日竹林中隤然脫巾醉風吹亂葉響醒看江日墜

南康元日

此日故鄉酒應憐千里違是處萋萋草王孫歸不歸

龍沙晚行

晚風度疎松琳琅動仙闕迴波滾明沙錯認地上月

聞夜笛

五月梅花落羈魂羌笛驚孰能風月夜更聽隴頭清

龍沙見新月

每訝沙如月龍蟠作後山如何今夜月却又學沙彎

村夜

萬物既有息我亦中林卧雲開迴水白地閃飛星過

其二

清林不知暑一覺羣雞鳴野曠氣森飈天空夜虛明

其三

霞明鳥聲起行人語中路微微林下風泫泫花上露

晚燒吟

早燒不出門晚燒行千里達人貴知時天道有終始

黃河冰

黃河一夜冰日光慘不發安得萬里鞭白馬弄晴雪

其二

夜冰白莽莽風來但飛沙梁園一夜雪枯樹皆梅花

宿蘇門

朝發陽武城暮宿蘇門里卧聽青山鐘遙在白雲裏
是夜雨

北風吹山雲不見山上月蘇門一夜雨千峰盡成雪
泉上獨酌

湧金亭畔路細雨不思迴獨酌看流水山花映酒杯
其二

白石誰家瀨輕鷗二月湍踏歌逢衛女風景似長干

黃州

浩浩長江水黃州那箇邊岸迴山一轉船到堞樓前

其二

日落清江遠光搖赤壁山無人說吳魏來往釣舟閒

鄱陽歌

漢水亦太急江渾只恁流何如彭蠡澤清瑩解人愁

雙泉寺題壁

寺僻無人行夜雨長秋草山僧出迎客落葉不曾掃

其二

我昔寺中遊題詩在東壁三年不見僧見之頭半白

書院

書院今人蹟繁臺古代名樓花翻入燕塔樹不巢鶯

白塔寺

遙訪青蓮宇相將白塔原春風亦自動爭奈碧莎繁

上方寺

飲罷塔廊坐塔深蘿葉垂欲枕石頭卧時有清風吹

釣臺

欽定四庫全書

終日釣石坐清波間我鉤擲竿望山月回見衆魚遊

白鹿洞

白鹿昔成羣鹿去誰復來樵子暮行下洞中雲自開

聖澤泉

嘈嘈鳴山泉日日噴悲壑日照一匹練空中萬珠落

枕流橋

峽急豈有心臨橋石相激驚驚橋上聽夕陽人獨立

風雲石

倚崖坐孤石北對五老峰中有千尺虹挂斷巖上松

門前溪

山溪信清淺入海作洪波果向地中轉應隨天上河

迴流山

登山眺四極一生日每夕行看夜來逕苔上有鹿跡

井

新穿崖下井微霞映深靜松風時來拂娜娜匡岳影

開先寺

欽定四庫全書

空同集
卷三十四

八

瀑岫生煙暝山杯坐不歸
簾櫳過渭水疑有玉龍升

其二

潭色何所似黛玉空人心
可道清見底龍蟠不在深

其三

瀑布半天上飛響落人間
莫言此潭小搖動匡廬山

其四

垂垂千仞瀑隨風下山去
吹作半天雨飄散不知處

其五

飛瀑湧寒峽流雲靜幽壑夕日倒峰影杯中雙劍落

宿開先寺

僧閣暮鐘靜夏涼風色幽月出照瀑布猿啼西澗流

歸宗寺王右軍故居

夕日照何寺夏雷喧此峰惆悵昔人去空餘山澗松

吳溪

三年作楚客五月度吳溪日射桃花嶺松陰鷓鴣啼

望龜峰

龜峰歸遇雨徹夜鳴不歇起望昨遊處惟見滿山雪

江行雜詩

十八灘都盡舟人慣不勞可言灘石險難測是平濤

其二

仄疊中江石衝濤萬古存遙看疑砥柱偶問識銅盆

其三

日月東西照支江南北流鷺飛如導鷁橫吹不驚鷗

其四

迎送山相似舟移迷北南回看皂口日已照石華潭

其五

錫洲潭古怪攸鎮驛幽絕四圍青山映鷺棲滿林雪

其六

日出青蘋濕江渾路不分昨宵驅雨至知是海南雲

其七

落日沒前灘雲移鳥欲還除巾不即卧恐遇絕奇山

新莊湯興

昨來杏花紅
今來棟花赤
一花復一花
坐見歲年易

其二

出城每自醉
斜陽坐芳草
黃鸝枝上鳴
花落有風掃

其三

逕樹團成蓋
原草綠如翦
盈盈車馬客
時來弄春醖

其四

未有此莊時
對酒無處飲
今來莊上遊
却恨酒杯緊

紫霞洞主歌

朝霞美海色閃爍如金蛇回光照巖洞駕我青鸞車

其二

雲洞窈窕行覓石髓食粃粃古苔上有書字不識

其三

丹霞熨朝旭桂葉一何芾中有騎鶴人下上隨雲氣

其四

朝餐赤城氣暮攬羅浮色常有瑤草花寒至不曾識

其五

石泉娟長蘿煙翠滿山室忽聞空中音幽人弄瑤瑟

田園詩

暑日郊出頻野意差日適鴉雀間繁陰榴葵乃炎赤

其二

初日暑力薄單車歷城曲隍飈卷蜻蜓苻帶舒復促

其三

掘塹不數尺及泉水忽湧誰為辨佳藕我今畜魚種

其四

淤泥獲拳卵蛇龍誰即分夜看置頓處似有五色雲

其五

園荒蒿藿長手鉏薙其穢那解蒔蔚區中有吐芳蕙

寄徐子

紫閣朝回夜金尊月映空祇應徐進士遙憶李郎中

其二

東省堂前樹南陽宅裏花春風如往日夜月向誰家

贈何舍人

朝逢康王城暮送大堤口相對無一言含悽各分手

寄都主事穆

江草喚愁生思君黃鳥鳴遙心將夜月同滿闔閭城

送余客

自寄還家信閨人數月圓住近沙溪口終日問來船

送人

頗訝楓林赤無風葉自鳴來人與歸客同聽不同情

贈客

出郭江南望暮天雲北飛斷蓬寒更轉長路幾人歸

過夏口寄惲君

君居楚城裏我傍楚城過相思連夜發無奈是江波

諸公石頭口舟餞

北巡察宋合舟餞此江潯晚別隔煙浦猶聞橫吹音

寄黃子廣東

昨遊梅嶺畔翹望嶺南雲恰屬梅黃日何由攀贈君

潯陽寄耿叅政致仕

連年卑濕地無日不思歸況在潯陽見君帆獨北飛

送鄭生

桃花浪初起三月爾江南萬樹垂楊色相留照暮酣

送人赴舉

寶劍動連星金鞍別馬鳴持將五色筆奪取錦標名

贈王左史

林卧每倦出時或一乘馬來訪王相國醉歸月明下

其二

君家百甕酒留連胡不飲花月我自來醉即花間寢

贈劉東

洎濱三月時花滿扶亭道翩翩白馬歸青袍亂芳草

戲鄭生求歐帖看

徽州鄭季子動輒古人師昨特衝秋雨因來問墨碑

送酒鄭生

旅食沙林暮年華北雁春誰憐竹葉餉同是采薇人

送王生北行

紫轡銀鞍馬青袍
白面郎揚鞭萬里去
謁帝入明光

其二

朝散午門西
春風起御堤
上林花半發
幾處早鶯啼

觀袁永之樂府戲裁子夜歌寄之

為問閭門柳
年來青若何
館娃明月夜
醉擁越兒歌

其二

日暖春波綠湖平
一鏡天船船載歌舞爭
向綠楊邊

詠李花

城東萬李樹此樹獨鮮奇竟日風開落無人誰得知

詠鷺

獨立娟娟鷺驚人離石磯遙看一片雪深映碧山飛

獲麋

小麋何山得出山今幾時笑爾深巖晚無言獵者知

饋雁

失却風雲翺來遊君子門未辭戈客幕終荷主人恩

花鳴

花鴨靜雲衣娟娟春草依臨池振頸卧夢拂楚雲飛

鶯曉

覲眈夢中迷流鶯碧樹西起來紅日照已度別枝啼

詠螢

葉暗輝輝度孤明炯自知月臨光不掩星亂影須疑

名花

名花似美人娉婷代應絕夕陽時獨立風起滿林雪

炭簍盆架

編荆為團籠本以貯木炭今匪用炭時聊以助吾盥

砂鍋盆

砂鍋注清泠洗面還洗心其器苟不潔徒稱玉與金

船板牀

船板胡在茲而我寢其上情知非江湖夢寐亦風浪

甌枕

盧生枕竅中哀樂竟何用我枕城甌卧無竅亦無夢

蘆蓆几

古人席地坐飲食俱在茲令人設高几翻謂古人卑

坏墩

晨興坐茲譚而亦坐茲食為言同寓子尚念埴者力

麻繩椀

何以架我衣麻繩撐兩柱諒有解脫心與子同一處

葛衫帳

酷暑睡不穩解衫周四圍但阻蚊蟲入無遮明月輝

漁村夕照

西暘下洞庭網集清潭上一丈黃金鱗可見不可網

山寺晚鐘

美人杳何處盈盈隔秋水遙遙雲外鐘日落暮山紫

平沙落雁

西風萬里雁一葉洞庭秋羣浴金沙軟瀟湘霜氣流

江天暮雪

長江浪滾雪煙黑花爭飛可怪橫流者孤舟一笠歸

洞庭秋月

天水本自空圓月況秋映晶晶起霜色千里一懸鏡

瀟湘夜雨

夜響起秋竹浩浩楚雲白曉來看沙觜新水添一尺

遠浦歸帆

秋風五兩席點點聚復散不信小小鳥飛飛速征雁

山市晴嵐

峰晴堆夜嵐晨炊翠猶濕但聞山鳥鳴不見鳥出入

薜荔園

芳園蒔薜荔水石非人間昔聞西洞庭今為學士山

恩樂堂

肯堂欽古訓修祀報前功酌泂歌行潦采蘋遵召風

石假山

磊竒成我山雲氣遽裊裊衣水即溟渤拳石是蓬島

水鑑樓

風吹池萍開天空水如鏡幽人時凭闌下看行雲影

風竹軒

吾軒自有竹暑月常寒聲山靜無風時滿林空翠生

蕉石亭

看石忽有詩攀蕉書其上夜來雨打葉驚聞金石響

觀畊臺

洞庭有興雲太湖無落波登臺問農者不勤將如何

薔薇洞

洞口薔薇密石花壓雲濕曉采枝上露不知鶴飛出

荷池

山風吹水香脫巾池上坐盈盈千歲龜飛上荷葉卧

柏屏

堂堂千尺材為屏忍屈曲終抱凌雲情不改歲寒綠

留月峰

峰竒自成竅似月非有心月來爾何意徘徊光與深

通泠橋


雨過崖水響石梁裊山澗晴天挂一虹溪斷雲不斷

花源

落英泛流水點點如飄霞為有問津者不敢種桃花

釣磯

磯根浸寒水細草綠如髮夜魚不受餌石上坐秋月



空同集卷三十四

欽定四庫全書

集部

空同集卷三十五

六

詳校官監察御史_臣龔驥文

中書_臣劉源溥覆勘

總校官進士_臣繆琪

校對官中書_臣袁文邵

謄錄監生_臣蕭日昕

欽定四庫全書

空同集卷三十五

明 李夢陽 撰

七言絕句

正德元年郊祀歌

戈馬喧喧動萬雷
黃旗繞繞拂仙臺
天上再開新日月
南郊不改舊蓬萊

其二

漢家天子自天威
春祀南郊雪圍
片片瓊花飄玉路

五雲偏逐袞龍飛

其三

壇官秉笏候金鐘
月出西南照雪峯
不向蓬萊看五色
那知天子是真龍

其四

中壇日月照天門
上帝龍行羽衛屯
煙裏桂花旋玉兔
火開三足抱金盆

其五

外壇羅列黃金榜海嶽齊開白石門直使衡山馳薊域
更看西海過崑崙

其六

神來擊鼓復吹簧一道虹飛萬丈光閭闔清風搖玉燭
至尊獨立殿中央

其七

帝是高皇八葉孫隆準龍顏稱去聲至尊翠羽繽紛來衆

聖洋洋古樂亂雲門

其八

漢王登封巨跡空楮山秦帝洞庭中何如黍稷天神享
萬歲高高太極宮

其九

天馬元從天上落七星裝入寶刀頭壇空月照更衣殿
萬錦羣中刷紫騮

其十

金輿還內放人看萬戶千門震地懽繡扇徐開龍虎氣

君身不動泰山安

帝京篇十首

古時灞水即蘆溝今代車書似水流日間五色龍天氣
天上春開五鳳樓

其二

漁陽北塞古風沙二月春風萬柳斜
蘆門轉作長安苑
燕桃開出武陵花

其三

慷慨燕雲十六州天門北極帝星頭烟塵一洗桑乾淨
萬載朝宗四海流

其四

山作青龍左右盤扶桑西影拂桑乾日光華朝萬國
天留北海作長安

其五

天皇按劍據金鞍飲馬追胡翰海乾歸來並立擎天柱
不數劉家承露盤

其六

遼后粧樓換上陽春風珠箔舞垂楊半夜開城歸萬馬
至今迷失幾鴛鴦

其七

今朝望海海雲生五色雲中白玉城金陵巧接盤龍勢
南北何如漢二京

其八

塞上星飛化羽林鼓音咸作管簫音將軍把劍聞鷄舞

玉女朱樓學鳳吟

其九

聞道匈奴入漢關
皂旗千隊射鵬還
君看萬古昏星月
洗出中華疊翠山

其十

自從黃帝破蚩尤
涿鹿雲黃黑
帝愁盤石果然為碣石
幽州常作帝王州

皇陵歌

皇陵疊翠倚丹霄
絳節飛光夜夜朝
千古長風吹海月
萬山松栢照空寥

傳聞駕回有紀二首

正德年
間作

正月傳聞大駕還
七日已度居庸關
鐃歌擬續之回曲
塞外應添駐蹕山

其二

白城新起望夷臺
黃鉞森森耀日開
萬里無塵邊塞靜
六龍騰踏駕空回

聖節聞駕出塞

千官北首望龍旂萬國車書集鳳闈八駿穆王秋色遠
幾時親擁白狼歸

其二

萬乘時巡萬壽臨鑾輿漠漠磧沙深悲忘殿闕呼嵩日
應繫單于款塞心

正德七年正月黃河清自清河至於柳家浦九
十里清五日焉

黃河水自崑崙出萬古東流元不清今瑞定於今帝應
世人休擬聖人生

嘉靖元年歌

元年正月又王春四海人稱拱聖人已報岐山鳴彩鳳
更傳闕內出麒麟

其二

大明十帝轉神明天意分明賜太平紫蓋復從嘉靖始
黃河先為聖人清

先是正德七年九年黃河
連清今上入繼大統之兆

送樂清少府

羽騎驂驪簇晚洲
彭彭簫鼓引官舟
為言獨對青松樹
何似逢迎綠水頭

其二

鴈蕩山前海色開
樂清城在白雲隈
紅桃碧柳津津勝
笑舞歡歌處處來

贈黃州牧

黃州江比使君清
赤壁山留萬古名
黃州小兒騎竹馬

來時相送去時迎

送友人

王孫笑向碧山棲
春日春蘿裊裊低
予亦悠悠芳草者
白雲愁色草萋萋

送周判官

明燈綠酒五花裘
客舍新秋螢火流
商君不飲真何事
明日出城風葉愁

送人入蜀

錦江風高生夕波
蘆荻蕭蕭秋鴈多
問爾鄉關何處是
巴人時唱下渝歌

詠東方朔贈馬吏部

據地酣歌金馬門
如花少女笑無言
不是偷桃太無那
人間那謫歲星魂

王吏部惠太玄戲贈

吾家小子象童烏
蒙惠玄文掌上珠
笑殺街西王吏部
今朝猶得酒船無

月夜過訪王子

率爾高陽飲博徒
酣歌擊劍膽何麤
金門貴客如相許
徑脫鸛裘付酒壚

僕思李白落鴈之遊
徐子亦有知章鑑湖之請
念人悲離申此短贈
徐子者禎卿也

君擬天台度石梁
我歸沙苑望咸陽
子今夢寐蓮華岳
笑爾翻耽瀑布長

嘲陸子二首

松江陸子以予久不造過遂蒙嘲詠然陸子往許
以小楷南征賦貺我久亦恡焉予故得反嘲戲之
兼訊後約焉

甚欲來餐張翰魚只緣難換會稽書西家愚夫莫浪謔
北海先生久索居

其二

我今四海覓雲松南遊笑指匡廬峰他時倘慕金光草
與爾同鞭赤玉龍

晚過序公戲贈并喜徐編修縉迹訪二首

月滿長安啼暮鴉
踏歌今夜醉誰家
青蓮大士迎子笑
背指秋鶯度落花

其二

長安大道竹林西
李白尋僧花下迷
舉杯恰對青天月
檻外驚傳碧玉蹄

夏口夜泊別友人

黃鶴樓前日欲低
漢陽城樹亂烏啼
孤舟夜泊東遊客

恨殺長江不向西

寄贈珙縣何氏夫婦

太峨西來通蜀門瀘江北接武陵源翁姑壽比江山永

縣北芙蓉似子孫

夫容山名

謝子饋笏答以駝布

交州象簡白雲光美人持贈意何長洮西駝布雖微細
被服能堪冷月霜

送王呈貢赴縣

二月扁舟過浙西
楚雲何日度
浯溪滇南小郭青山繞
花發流鶯一樣啼

寄錢戶部

春城雞啼月欲沒
西鴈東飛遲
明發風裏楊花不定飛
震澤迢迢限吳越

酬姚員外龍興見寄

龍興龍沙一里餘
江風吹落錦雙魚
君覽浙潮須盡海
赤霞飛袂過匡廬

贈丁生

海涼秋水淨芙蓉
青天倒懸五老峰
眼見排風生羽翼
行空那辨有真龍

別達生

醉約金山看海流
興飛江漢忽西遊
龍沙月色年年滿
獨照匡廬萬仞秋

寄別陶生

青雲峰下紫雲生
中有花樹春鳥鳴
聽鳥看雲一杯酒

黃塵回首萬家城

別李生

華也南來送我行
青絲挈酒玉壺輕
滕王閣下江千尺
一曲滄浪萬古情

贈鮑激兄弟

水學青龍左右盤
玉流雙瀉碧光寒
蘭昆並占空山月
分掣虹霓作釣竿

贈劉君按察雲南

碧雞金馬古黔陽
滇海秋搖日月光
自此蠻中無毒熱
行臺六月有飛霜

送蕭總制赴鎮

漢家新拜霍嫖姚
司馬今年相宋朝
旌旗一舉三邊靜
鴈塞平沙演射鵰

送修武知縣

青山盤谷繞桑麻
赤水河陽接種花
琴罷吏希簾晝捲
自看雙柏哺慈鴉

贈李沔陽

雲夢茫茫繞一州
滔滔江漢古今流
問俗不須乘五馬
畫船簫鼓水鄉遊

其二

楚人抽棘霸江湖
萬載孤城剖一符
從此沔陽為渤海
直教雲夢作蓬壺

寄郭帥

匡廬彭蠡兩蒼蒼
月館花城古豫章
誰信罷兵張宴地

夜深偏醉郭汾陽

寄謝卿

擲笏南還尚黑頭
移家西郭興全幽
春晴定上滕王閣
日暮江平起白鷗

贈陳氏

萬龍岡上古靈家
男樂耕耘女績麻
客到大開萱草閣
春風時動紫荊花

贈蔡帥

時清晝卧銅牙弩客散宵披玉檢文可道將軍渾是武
曾將三策獻明君

送王韜

王郎口談金虎文自稱師是紫陽君挂帆明月忽南去
影落龍江五色雲

贈羅氏

羅隱北下黃金臺牡丹芍藥次第開極目長江渺天際
八閩秋盡一帆迴

送熊進士入朝

武帝南征並海迴九天雲罕拂天來縹緲羣仙朝絳節
五雲宮闕是蓬萊

其二

蒼蒼玄武鎮皇州天上銀河轉地流言君不是乘槎者
昨夜分明到斗牛

其三

金馬岩巖接鳳臺石渠高閣倚天開仲舒早備天人策

漢主臨軒問自裁

二月望丘翁林亭

今日花朝好風日
梁園酒新花更開
走覓南鄰丘處士
月明騎馬醉深迴

其二

南鄰處士閉柴門
竹樹春風野徑昏
痛飲狂歌人不識
客來惟欲酒盈樽

東鄭生

東園紅杏日紛紛東望無煙蝶滿雲
少出違期因怯馬
獨吟停盞為思君

其二

城門春禁不行車
病懼攀鞍只在家
昨日東風來著意
庭前忽放數枝花

雨俟屠君不至

暮倚高樓因候客
雨來如注復如絲
試看春日洪州道
可是山陰夜雪時

寄顧台州

巾山何似峴山遊
雲島長和海色幽
定有兒童笑山簡
君今孰與鄭台州

其二

怪爾分符坐赤城
東南遙見海霞生
梅開莫寄西來使
春到煩求碧玉精

太白山人仙遊吳越稔矣
日者卜居吳興而婚
施氏妻妹子聞之輒詩嘲焉

范子無端出五湖西施並載有耶無詩人只合鶯鶯伴
施家今是大姨夫

其二

見說仙人萼綠華

萼綠華晉昇平
中降羊權家

麻姑亦降蔡經家即

防獅子河中乳背癢無言爪得爬

雲中曲送人十首

壯士驅車出漢關馬頭絲絡紫金環莽莽黃雲迷代北
淒淒白霧滿燕山

其二

季冬飲馬長城窟
沙磧飛揚帶白骨
榆臺嶺邊聞鬼啼
猶是今年戰亡卒

其三

黑帽健兒黃貉裘
匹馬追奔紫塞頭
相逢不肯通名姓
但稱家住古雲州

其四

城上黃旗張暮天
元戎宅內鼓闐闐
底是鄰悲并巷哭

雲州明日是新年

其五

紫水東來入黑河
紇干山下雪花多
小兒攔街吹簫簾
婦人能唱海西歌

其六

白登山寒低朔雲
野馬黃羊各一群
冒頓曾圍漢天子
胡兒惟說李將軍

其七

自從寇逼鴈門關漢家四野多空壘行子遙遙看獨戍
桑乾水永暮沙起

其八

黃毛愛子出打圍昏宿李陵古臺下忽傳風火入邊城
城中將軍夜秣馬

其九

戰士黃鬚立道傍自言曾射左賢王可憐孤績無人論
贈與青裘白馬郎

其十

北風吹日馬毛僵腰間角弓不可張
馮君莫唱雲中曲
臘月雲中更斷腸

對菊懷鄰菊子三首

巳巳年
閏月

舊種寒株傍吹臺重陽今歲不曾開
遙思爛熳還憐汝
欲比馨香恐見猜

其二

睡起今晨看菊花霜枝冷藥忽參差
非時未必輸桃李

三徑遙憐是一家

其三

爾家堂閣皆隣菊
秋至滿地黃金錢
不信南州能暑熱
直將花蘂破霜天

送吳生

吳子乘春東入吳
飛花獻舞鳥提壺
此去囑君多載酒
直收春色過西湖

東園贈鮑演

修竹南牕花北牕翠陰濃色兩無雙
隔城走馬催銀燭
今夜留君倒玉缸

春日東莊要杭子

白首春風獨種瓜故人常恨隔天涯
今游莫憚駟行遠
十里柴門有杏花

東雙溪方伯

十旬不見雙溪子白晝看松只自眠
君對紫薇誰是伴
相逢還似未逢前

送人之南郡三首

梁園千古見風流
醉上任樓復謝樓
相遇片言心便倒
腰間含笑解吳鉤

其二

鼓刀朱亥本微寒
白首侯嬴是抱關
不為千金增意氣
祇緣一諾重丘山

其三

南陽帝里近親多
岡勢盤龍繞白河
便欲臨分留寶劍

方城漢水待鳴珂

陶子見過草亭遂以留雲名之大書刻木我亭

增色爰賦二詩酬陶亦兼自意

小構茅亭傍一松雲來雲去寂無蹤晴天戶牖濛濛濕
遂使人疑有臥龍

其二

茅亭自得陶公筆盡日光芒動白虹山澤不煩通地氣
片雲時起墨花中

春日宴王孫之第二首

紫宮華宴敞春風
密樹初花日映紅
向暮酒闌香不斷
始知春在綺羅中

其二

迴廊曲榭稱春游
綠酒紅花白玉甌
借取遊絲繫西日
晚風吾上海棠樓

要謝憲使南莊泛舟

柳鳴荷塘野意寬
操舟曳杖獨遊難
春來欲製東山屐

倘許花樽共謝安

江上逢鄭南溟

楊子灣頭紅蓼秋水邊樓閣樹邊舟
一日長風破萬里
為君三醉過瓜洲

白鼻騮

羽箭銀鞍白鼻騮春日徐行踏落花
揚鞭突入章臺去
背指垂楊問酒家

少年行

漁陽突騎幽并兒，彎弓射獵南山陲。
橫行未遂為人下，意氣憑何結主知。

春遊曲

騶馬銀鞍金市頭，都門掣電落花流。
揚鞭笑指胡姬肆，轉拂垂楊向玉樓。

其二

大道紅樓珠箔垂，風起楊花欲暮時。
胡姬半醉半遮面，惱殺幽州遊冶兒。

絕句

將軍鐵騎戰金微八月長安盡搗衣砧聲欲落三更月
翡翠樓頭鴈却飛

壽歌

沙溪三月杜蘭香錦浪千層碧玉光勝日賓筵開玳瑁
檻花飛入萬年觴

其二

門對黃山第幾峰翩翩白鶴舞青松玉童來授軒轅訣

素女邀乘赤色龍

松鶴壽歌

松裊石門千仞開
天風吹鶴下瑤臺
傳書為問西王母
別後蟠桃熟幾迴

夷門十月歌

小麥青青水半陂
半落不落楊柳枝
回風忽送天南雁
恰似春江二月時

黃河風雪詞

渺渺黃河風雪生雲愁海思不堪行陽春白雪非難和
公無渡河無限情

異景

異鄉異景客中身秋雨秋煙無那春梁園八月如三月
笑殺桃花更笑人

暮春余莊

暇即來遊困即眠玉林長醉彩雲前春風暮起楊花亂
疑是梁園雪裏天

潯陽歌

百尺高樓橫映江
江花朶朶照成雙
風波隔浦遙相喚
腸斷南來北去艣

汴中元夕五首

花燭沈沈動玉樓
月明春女大堤游
空中騎吹名王過
散落天聲滿汴州

其二

玉館朱城柳陌斜
宋京燈月散煙花
門外香車若流水

不知青鳥向誰家

其三

中山孺子倚新妝
鄭女燕姬獨擅場
齊唱憲王春樂府
金梁橋外月如霜

其四

四海煙花逢上元
中州行樂競千門
大江不辨魚龍戲
珊瑚寶玦是王孫

其五

細雨春燈夜色新
酒樓花市不勝春
和風欲動千門月
醉殺東西南北人

七夕

雲寂露涼叢蕙悲
意銜情恨隔年期
殘機夜歇金螢度
怨女啼春玉箸垂

獄雨

冷雨橫天八月來
黑雲來往赤雲開
潯陽李白何如此
宋玉悲秋未是哀

其二

雨打潮門流海煙隨風散落鳳城前
愚臣獨抱枯魚泣
何日金鷄下九天

空同集卷三十五

欽定四庫全書

空同集卷三十六

明 李夢陽 撰

七言絕句

諸將八首

穆張亦是梟雄將
膠柱談兵實可憐
力屈殺身同一地
喪師辱國在今年

其二

諸將才猷豈盡奇
大都力戰各乘時
黃毛近怕莊游擊

黑面休誇李太師

其三

聞說當時掃地王威名朔漠陣堂堂
自稱大將張旗鼓
首控驂駟出戰場

其四

但富黃金與白珠登壇擁衆鎮邊隅
即使勉攀貂玉貴
終然不類將門趨

其五

國公承襲惟紉袴侯伯雖多大抵同舊典此中掄大將
平江英保是元戎

其六

紫塞長城萬古悲塹山還復見今時敵人祇益輕專制
老耄何堪銳出師

其七

天下軍儲盡海頭材官郡國徧防秋若道成功無造偽
豈應屠賈坐封侯

其八

黃河青海入狼煙漢將胡兵殺氣連
安得即時尋魏絳
務農休甲報皇天

憶昔六首

已已蒙塵數郭登馳驅國難有楊弘
如今豈乏熊羆輩
比較元非擊搏能

其二

北望黃雲想翠華千官徒跣哭清笳
安危社稷惟司馬

天下車書又一家

其三

石亨善戰真無比
跋扈飛揚却累身
佩劍豈宜思死士
拖金終要作誠臣

其四

王竑犯闕雖愚戇
舍命臨危亦大夫
猶勝鬚眉為婦女
更憐冠劍學兒徒

其五

吉祥寵幸反稱兵一夜達官塵滿城悖逆天誅終不赦
此曹王法更須明

其六

半夜飛章入鳳樓寇公流血李公憂爾曹作逆同蒿草
臣節江河萬古流

京師春日漫興五首

十日不出花盡開城南城北錦成堆即教閉戶從花盡
莫遣看花不醉迴

其二

杏花盈盈太遲姿
桃花灼灼亦不遲
縱饒種露栽雲地
可奈風狂雨驟時

其三

東門百花紅照天
獨樹梨花更可憐
但看絃管朝朝急
不道春風不費錢

其四

今番花開委難當
眼見稀疏葉欲長
春光幾朝不一醉

為問汝曹因底忙

其五

西湖湖上楊柳枝
臨流嫋娜風更吹
切防白雪漫天舞
莫放黃金拂地垂

牡丹

亂絮繁華春更煙
一枝嫋嫋獨風前
玉園忽漫無顏色
徐步看君却自憐

其二

若使姚黃無魏紫
孰容傾國復傾城
接枝一任今人笑
不墜花王萬古名

其三

莫道清平調獨狂
牡丹元不與昭陽
後來亦是先花葉
誰醉君王玉笛傍

其四

秦地洛陽俱寂寞
圍開周國復天香
童時及見流傳譜
萬意千心足斷腸

其五

漫山故國花無數
客舍河頭今數株
絕代色孤終不掩
丹葩綠葉錦心須

郊園步花

常苦出城花不開
花開今日共風來
亦知誰便渠能主
獨步徐看數十迴

其二

即使憐花何恁苦
不如開落任風吹
花開花落從渠得

柰記載桃種柳時

步庭中海棠下

買宅兼花事亦希樹成春足主人歸
花開已詫臙脂透
葉展還驚翡翠圍

其二

若較梨花憎太白縱多桃李葉全無
何如翠袖紅粧倚
的的黃鬚錦瓣扶

其三

獨恨無香恐未真紛紛蜂蝶底相親俗傳定欲燒銀燭
絕代誰為照睡人

其四

沈香亭上已多懽夢入昭陽月色寒若使天香亦傾國
君王應更倚闌干

詠庭中千瓣榴花

藥欄爾後花希賞日日東齋只困眠每易庭榴樹底小
一朝開亦照高天

其二

的的朱榴夏始成
水簾冰簾益分明
偏枝不動宜雛燕
接葉時披稱小鶯

其三

萬瓣千鬚始一花
累累應只為年華
春風無限傾城夢
結實誰真取世誇

雪中見枯樹似梅

憶在江南梅照眼
幾年繁蕊失溪雲
如何枯樹尋常見

一雪垂花朵朵分

其二

可向繁枝問假真紛紛過眼即飄塵東風一夜高樓遂
亂落紅梅誰柰春

喜雨

破到榴花今日雨向來紅紫可憐吟蝶沾蜂濕徒增忌
杏綠梅黃亦苦心

其二

二麥臨河半欲黃
一夜生長誰禁當
揮鋤荷笠能辭苦
浪潑雲翻慮爾忙

其三

水缺沙乾燕只忙
交交鶯羽閃無光
今辰底恁穿楊急
拍拍銜泥向我堂

夷門曲

黃河岸頭多客船
大堤小堤楊柳煙
獨樹花開特造次
鄰家香醪不索錢

其二

南堤二月杏花紅
北堤高樓紅映空
珊瑚寶玦誰家子
繫馬門前青樹中

新水至

桃花照水楊柳長
河水新添一尺強
昨夜舳艫銜尾至
不是魚航是酒航

其二

時和驛邊河水流
康王城近舍西頭
青蘋滿眼汀洲裏

芳草連天無那愁

狂風

狂風吹柳裊裊長杏花落地如白霜
後來好花開細細
昨朝風惡更難當

其二

來禽青李不須猜
一日一夜桃花開
朝來春風休更惡
枝頭綠葉暗相催

其三

新築茅齋近北堂喜有楊柳千尺長不爭一朝風折盡
赤日炎天何處涼

河上

河上昨宵風勢惡狂花不敢更高飛農夫日望甘霖至
估客深愁逆浪歸

雜詠

春盡梁園花不稀隨風片片坐人衣丁寧百舌渾休語
遮莫林鶯且自飛

觀小兒吟詩戲作絕句

關中韋杜世稱豪王謝江東底更高
蘭茗翡翠空啾唧
肅肅雲鴻萬里毛

東園花樹下

夜來睡美春風顛
朝望大梁花滿煙
錢家東園好李樹
堪可鋪排無酒錢

其二

今年春色太無賴
千樹萬樹花分明
便學少年出走馬

更拋香彈打流鶯

登臺

梁孝臺前白杏花
眼看風落散晴沙
黃鸝恰恰誰為侶
紫燕飛飛自作家

聞桃花盛開

不及東園紅杏時
梨花懊惱太開遲
即防桃李紅欺眼
更打黃蜂莫近枝

張池春日即事

東門野塘花樹紅昨日不風今日風倒着接羅習池上
狂調生馬竹林中

漫興

白水蒼山萬里身詠花吟鳥百年人城門此路憐芳草
盃酒他鄉不是春

其二

楊柳春江對自流清沙白石伴誰遊弋人莫羨能鳴鴈
海叟虛疑不動鷗

錢園二絕句

去年錢園萬李樹落莫今春只數枝多應斬伐貧人賣
豈復能思爛熳時

其二

牆東李樹太含胡院背夭桃斬不枯及早榮枯休浪擬
趨時車馬自應趨

城南別業

傍塹沿堤二里餘柳牆茅屋此成居浣花便擬吾何忝

獨愧窮愁懶著書

春日豫章雜詩十首

東角樓東寒食日
吾家海棠雙樹花
忽憶花開吾在此
豫章寒食獨思家

其二

亂蘂濃花今有無
舊趨北闕憶西湖
垂楊畫鷁金鞍戲
三月煙花滿上都

其三

每愛高樓畏獨來，非關勛力怕徘徊。
江頭無限桃花樹，恰到來時滿眼開。

其四

江花照水兩三枝，弄日吞煙是爾時。
不應春風與作意，掛斷低空百尺絲。

其五

東湖鷓鴣有幾歲，踏浪爭花何恁遊。
可憐汝輩異情性，拄杖獨看春岸頭。

其六

爛熳誰家臨路枝
留連蜂蝶過相疑
行人莫羨渠能主
落水沾塵會有時

其七

江南春事殊懊惱
五雨十風常不晴
今日天開聊一望
却憎花柳太分明

其八

江北每嗔花不早
清明出郭始芳菲
可道江西渾不冷

清明桃杏亦初飛

其九

樹頭春鳥苦喧聒
欲打還留催好春
院裏八哥何事者
羣翔緩步不知人

其十

苦吟實是被花惱
今日携壺何處傾
鳳凰洲前好楊柳
弄日鳴舷遮莫行

漫興

城外清江城內湖水門通貫古名都魚跳浪濶終難網
鳥立沙長豈得呼

其二

久雨今晴燕得飛城中江畔步徐歸煙花晚閣偏衝檻
柳絮晴橋故點衣

漁父

應手扁舟去若飛回流撒網倏成圍金鱗翠鬣心俱切
得意誰先蕩槳歸

新買東莊賓友携酒往看十絕句

芳園垂老慚為主門巷開除即是家不知櫻樹春能早
便把櫻花作杏花

其二

園芳細認紛無數太半朱英間碧林
寥蓋美枝惟恨晚
對花誰記種花心

其三

年來好事推劉四酒興花情老獨濃
最喜能移山茉莉

所嗟猶欠木芙蓉

其四

黃鸝故轉千頭柳
白蝶能穿百結花
敢道牆榆渾不用
新巢樹樹可慈鴉

其五

今春自買城東園
暇即郊行不憚煩
不應對客誇林竹
日日柴門有駐軒

其六

買地兼園已自饒來游況是百花朝細看却怪林間笋
迸檻穿籬只恁驕

其七

靜處亭亭竹萬竿弄煙濡露不曾寒多栽要識前人意
秀色憑渠雪後看

其八

鮑子知我遠載酒鄭生騎驢獨踏春灞上孰如彭澤柳
竹林休認草玄人

其九

邊村黃子先曾約百畝十年今卜鄰元是隱淪須共酒
非因花樹始同春

其十

為花底恁朝朝出風日清和今古稀傳道鄭生重載酒
寄言花蘂莫輕飛

東園遣興再賦十絕句

經宿隔城花盡開園扉深閉蝶應猜小車即病行能穩

一日來看須一迴

其二

朝出看花車暮迴轅西東望復徘徊黃昏蜂蝶休虛鬧
明日深枝花更開

其三

萬蕊千葩枉自奇海棠臨牖獨專姿今人盡仗繁枝葉
國色紛紛却未知

其四

百花叢裏一茅堂
獨坐時傳百和香
隔簾誰放游蜂入
撲酒衝琴特恁狂

其五

分行種樹非無意
薺穢蔣煩亦用情
何事草蒿欺便得
芊芊滿地不知名

其六

舊種丁香間石榴
花時榴葉未曾抽
試看赤艷傾陽日
亂萼繁英何處求

其七

護徑局園意自知百年今日是花期
昨屬客過貪勸酒
僮人背折兩三枝

其八

呼童刈草栽吾菊夾徑分行補種葵
怕認野人為魯相
旋刪修竹起東籬

其九

人生無求心自寬酒香花明身幸安
忘憂豈啻憑萱草

蠲忿何勞問合懽

其十

吾園亦在東門外
昨日清明手種畝
不信邵平能五色
吾園兼有武陵花

痔不可車旬日
乃造於東園
春葩向殘夏英欲
起慨焉動於老懷
再賦絕句十首

鮑歸昨誇百結
勝惜我病阻孤春
妍豈謂今開兩荆樹
分枝的的照紅煙

其二

桃杏葉尖荷葉圓楊花亂撲如白綿
若言春事渾無曲
榆莢何緣亦貫錢

其三

昨當春色散年芳競媚爭妍各擅場
一出牡丹諸便歇
固知渠是百花王

其四

檻西新笋不太甚一夜迸堦橫
我簷汝雖天生剛直物

豈容出地頭頭尖

其五

吾園種種無樛木
兩葛縈紆底自芳
客到更無愁醉酒
醉時但臥此花傍

其六

情閒有時被物惱
即無恚怒亦生嗔
頻來語燕如疑主
獨立鳴鳩不怕人

其七

為園偏種閒花草我欲移松無處栽深山瑟瑟誰知汝
可惜凌雲聳壑材

其八

亦知盆沼非源水試放魚苗喜即成敢說寸鱗無變化
煦花吹絮已橫行

其九

花時酒客圍花坐今日紅稀客不看即使盛衰遵物理
何須反覆似波瀾

其十

萬竿美竹修修翠愛此朝朝坐竹中
困酒實應慚阮老揮絃聊竊比嵇公

東園湯興之作

大麥初黃小麥齊櫻桃半熟壓枝低
先生皂帽何為者白首看花日每西

客有欲除我東園草者詩以止之

綠匝紅稀可柰春友車朋馬故應頻行邊
莫便鋤閒草

但入林園仗主人

牡丹絕句

自知國色無倫比
放徧羣花每後開
獨艷不教霜雪妬
先春甘讓凍園梅

其二

看盡羣芳見此花
後時莫謾為渠嗟
爭開若使先桃李
誰與春風殿歲華

葡萄

萬里西風過雁時
綠雲玄玉影參差
酒醒試取冰丸嚼
不說天南有荔枝

除前五更聞習儀鼓角感而有作

蒼龍闕動朝元日
玉笋班齊舞蹈時
枕上忽傳新鼓角
眼中如閃舊旌旗

其二

兩朝舊是含香吏
豹隱俄驚二十年
猶記習儀端笏地
朝天宮裏聽鳴鞭



空同集卷三十六